

四庫全書

集部

欽定四庫全書

集部
莊靖集卷三五

詳校官中書臣沈 颺

主事臣呂雲棟覆勘

覆校官中書臣汪師曾

校對官原任典簿臣郭祚熾

謄錄監生臣連彭年

謄錄監生臣趙由青

欽定四庫全書

莊靖集卷三

金 李俊民 撰

五言絕句

一字百題示商君祥

余年三十有九遭甲戌之變乙亥秋七月南
邁時姪謙甫主河南福昌簿迎至西山僑居
廳事之東齋小學師商君祥投詩索和頃刻
間往回數十紙謙甫曰一鼓作氣未可敵姑

堅壘以待姪壻郭鴻漸曰可以單師挫其銳
乃出百字題請賦以酬之遂信筆而書殊無
意義付其徒孫男樂山示之三日不報謙甫
笑曰五言長城不復敢攻也君祥於是攜酒
來乞盟大會所友極歡而罷

風

汝未聞天籟簸揚箕有神能清常侍暑不動庾公塵

月

過圓旁死魄過缺哉生明高賴王斧手再脩然後成

雲

旱魃將為虐從龍便出山人間三尺雨命駕早知還

雨

晚有來蘇意憂深望歲人一犁雖美滿猶恨不當春

雪

細看花是雨將見麥宜秋度臘無三白梁園誰與游

山

功名雙髻雪心事數重山山下人家好終朝爽氣間

泉

滾滾勢長往冷冷味自清擬將修水記何況有詩情

塵

不憂懸榻室可奈汙人風踏破青鞋底猶疑是軟紅

春

來莫怨春遲去莫怨春忙春不隨人老誰教汝斷腸

暑

人間三伏暑海內一薰風獨詠微涼句公權似不公

寒

廣廈千萬間吾廬敞獨寒猶將折絃琴欲和薰風彈

晝

冬之日何速夏之日何遲山中無厯日遲速兩不知

夜

令乎日之夕政乎日之朝一尊待君子風雨會良宵

晴

展盡舒長景銷殘片段雲區區負暄子炙背不忘君

陰

朝見白雲縱暮見白雲橫不作及時雨何為點太清

花

惜花不論命看花須努力能得幾時好狂風妬春國

蓮

碧因圓更展紅向老猶粧鏡裏風流在人言似六郎

菊

色笑秋光淡香嫌酒力慳東籬在何處客裏見南山

梅

未報江南信先開雪裏村要看花上月立馬待黃昏

松

鬱鬱愁無地青青獨有心疑從大夫後傾蓋到如今

竹

瀟灑能醫俗檀欒看上番我寧負此腹忍使籜龍寬

草

日沒露易濕日出露易晞人生大都幾王孫胡不歸

燕

社後來何暮梁間話頗多巢泥愁未穩無面見淘河

鴈

俄見天邊字徒銷客裏魂一書言不盡為我叙寒溫

鷗

江靜烟籠雪天晴水浴衣漁歌驚不起物外兩忘機

鶴

去家丁令威化身徐佐卿不戀乘軒寵九臯堪一鳴

蜂

弄晴沾落絮帶雨護園花有課常輸蜜無春不到衙

蝶

元從生處樂肯向死前休花底人間世如何不夢周

龜

汝殼將自遮汝腸還自剝可憐一底板雖智不如愚

魚

華亭載月船長安遮日手一網腥城市吾於爾何有

蟹

食必視本草貴在精物理蔡侯何鹵莽幾為勤學死

儒

秦坑秦即孤魯戲魯尋削伊誰蹈前軌可謂來高閣

僧

貌與松俱瘦心將絮共沾一菴空寂地香火讀楞嚴

道

自知身是患常謂道無名欲作閒中友隨緣論養生

仙

千載遼東鶴雙飛葉縣鳬應憐塵世裏無地著臞儒

禪

見桃渾不悟對栢未嘗叅虎嘯龍吟子風雷振一龕

醫

愈風陳有檄止瘡杜能詩雖然醫者意何意亦何醫

卜

棄置復棄置其然豈其然百錢聊為我更看小行年

漁

一聲歌欸乃萬頃國烟波鰲蟹中間醉蓑衣拜浪婆

樵

雲外山將遍人間日易斜不知棊換世柯爛未還家

客

渺渺亡羊路悠悠化鶴身人間同逆旅誰主復誰賓

農

賣劔田園計溫家種樹書新年無罪歲事事有乘除

牧

蓑底因緣曲腰間敲棘鞭月明歸去晚想見葛洪川

射

手撚金僕姑身出矍相圃不穿百步楊志在南山虎

獵

終日無獲禽古人獵在德非德為禽荒獵食吾不食

詩

裁作牛腰束愁於飯顆山近覺故步窘十債九不還

書

入室五千卷插架三萬軸何似曬書人坦此便便腹

筆

不見中書君不聞老成人為君作佳傳繼者皆尖新

墨

松間老潘谷何處得玄圭速置薔薇露詩仙醉欲題

紙

慇懃翰林主揮掃驚風雨滴滴是玄珠點破先生楮

硯

端溪溫潤石價重百車渠一滴玄潭水蠅頭萬卷書

畫

有意皆堪譜無言總是詩潭潭居相府此譽不妨馳

琴

陰壑鳴松籟空巖響石泉此聲并此意誰得寄徽絃

棋

縱橫連井地明暗列星圖兩角觸蠻戰一家瓜葛無

劍

帶牛移漢俗匣刃出鄆城安得治復古器農不器兵

香

小炷博山鼎半殘心字灰游蜂何處客應為百花來

茶

人多愁水厄若箇有詩情靈草還知我平生事不平

師

絳帳風流遠青衿禮貌驕定須防射羿何必問嘲韶

學

邑化絃歌地鄰漸俎豆風二三言志子六七詠歸童

仕

雖有乘桴意能忘出畫情一官百僚底是亦道之行

富

狼籍胡椒斛破散堆錢屋不見貧者愚求榮是求辱

貴

鴟得腐鼠嚇大笑狡兔死唾手功名場不知憂患始

貧

書生祿有籍造物費亦省顏回一簞食不得盡晚景

隱

孔負二宜去嵇知七不堪青山休老地佳處是終南

智

樂在知幾早憂因見道遲遙憐鮑莊子人笑不如葵

愚

膏以明自煎薰以香自薪善哉柳侯意一字辱溪神

壽

灰如戀闕心雪似窮經首問年今幾何看飲屠酥酒

老

尊年鄉飲禮擊壤太平歌甲子君休問光陰得最多

名

求為天下士所望不亦厚得少失有餘何況在身後

友

偶因勢貴賤乃見朋得喪歲寒山陰雪獨有戴可訪

身

黃卷平生志青山見在緣百年今已半只合鬪尊前

影

相對鏡中真相隨月下人我今未忘我身外還見身

行

水笑杯猶渡山驚錫尚飛垂垂瓶鉢老何處未來歸

住

俗尚家靈運誰堪社遠公空山雲不出愁殺渡溪風

坐

一軒容膝安半世行脚債龐家老居士舉似無生話

卧

一室散天花一榻颺茶烟家風嗣阿誰殘月曉風禪

笑

和氣須懽伯開顏只孔方世情如苦海件件可關堂

吟

冥搜腸亦苦隻字得之難作者有六義惜哉坐一寒

醉

愛此真珠滴能於大道通與君同舉白憐我獨潮紅

醒

暫出陶陶境那禁種種愁舉觴邀明月却帶醉鄉侯

飲

竹葉杯中醪金釵坐上春淺斟低唱境猶道是麀人

舞

野鶴聞琴態孤鸞覽鏡妍為君小垂手無地可回旋

睡

客隨陶令遣齋甚太常嚴儻或非黃嬭那知此黑甜

夢

物外日月忙人間憂患長休談夢中夢萬古一黃梁

歌

大音聲自希賞音人亦寡寧可逆汝耳不可廢作者

嘯

成瑨風生坐孫登月滿臺東臯今寂寞元亮早歸來

傲

王公輕以道富貴驕以志我見高尚人盖有高尚事

間

太傅懸車里仙家避世壺老妻為紙局坐隱是功夫

懶

交有書堪絕師何記可嘲不僧亦不俗似癡還似高

話

萬事就庾談一心對芝宇不思炊作糜但見風生塵

浴

子春恐事敗終之坐水滄二者過不及何如我洗心

歸

世路雖多梗吾生豈繫匏西風倦飛翼樂在一枝巢

別

更盡一杯酒出門行路難送君過南浦忍淚凭欄干

愁

解使回腸斷能催兩鬢秋天涯未歸客容易上眉頭

忍

氣留臍可煖唾使面自乾無怨亦無惡此腹如此寬

蠶

蠶月始條桑忽忽婦姑忙天寒授衣節婦姑無完裳

織

泛槎驚誤客折齒笑狂隣不作迴文字愁嫌愁殺人

春

斷木纔脫粟濕薪空爆竹朝餐動及午奈此雷鳴腹

炊

旅食寄天涯愁如桂玉何莫忘生處樂聽取處處歌

砧

對影無情石關心寄遠衣天涯鎮長客鴈後不懷歸

琴

此以下四首和籌堂

山水有清音琅然出枯木若教俗耳聽絲竹不如肉

碁

森森戈戟心盡在皮裏著傍有爛柯人點破都是錯

書

一坑科斗灰難破祖龍惑三兩挾策人今誰席肯側

畫

手與心相應妙處在咫尺筆尖多少鋒揮掃天地窄

東郊行

四海尚干戈幾人知稼穡青青原上麥忍放征馬食

書壁

世事紛紛變人生種種愁行年三十九得歲又平頭

避亂

雪巖依日煖霜樹弄風悲山似王維畫人如杜甫詩

資聖寺壁

是誰將壁疥盡可著紗籠今代無詩史何時入國風

別陳之綱李得之南子榮

時在宋

已兆池魚禍尚多風鷁過寄與遠遊人莫待贖行貨

戲高廣之

一飲遇伶婦一飯值邱嫂徒教乞米僧時時送盧老

雨後

新秋積雨霽涼風吹我衣歲月不知老乾坤何處歸

九日答朱壽之

與客登高處節物傷遲暮不見白衣來三復秋風句

竹林

初見錦綳脫氣已傲霜雪天寒十萬夫未聞一死節

栢徑

歲晚節自抱足見有心哉遊人從何處帶得春風來

槐亭

蟻穴功名重或作封侯夢主人心已閒不為黃花動

稻塍

一水自縱橫廢田無上下居民不佩犢歲事在秧馬

儒

世治其術重世亂其術輕太平然後用用然後太平

蝶

轉首一場夢驚心三月春揚揚枝上蝶不見惜花人

熊白

所居無禹廟有官升典籤掌亦我所欲二者不可兼

十六日夜戲書

貪作梅花夢都忘柳絮禪可憐人與月不似夜來圓

作臧

切祚

六言絕句

雪菴題錢過庭梅花圖

已把傳神盡譜又看格在詩評月落難尋清夢雲空乃
見高情

示姪輩

諸阮以富相誇二疏恐財為病濟叔不羨金埒勸兄曾
有過命

淵明歸去來圖

先生從來寄傲肯向小兒鞠躬笑指田園歸去門前五
柳春風

中秋

三百六旬歲周一十二度月圓試問姮娥甲子和閨到
今年

郎文炳心遠齋

竊笑濫巾北岳那能補衲中條自有胸中邱壑不妨隱
向市朝

伯德仲植張長史帖

莫就嚴陵買菜無勞逸少換鵝但得雲烟一紙那在鄴

侯書多

戲沂公巨川

八仙詩裏蘓晉三笑圖中遠公選甚逃禪破戒我師自
有家風

戲武夫韓公二

論功終是獵犬見事不如擒虎我願一識荊州人道莫
逢玉汝

結柳未送窮車敝衣先入歌院雖得蕭何拍蹤難與老

子同傳

老杜醉歸圖二

尋常行處酒債每日江頭醉歸薄暮斜風細雨長安一

片花飛

百錢街頭酒價寒驢醉裏風光莫傍鄭公門去恐猶恨

在登牀

史遂良酒債四

都因焚券家貧親與當爐人賣問得街頭酒價索取江

頭酒債

酒誥一篇既出離騷亦可不作愧我家無阿堵笑他人
飲狂藥

滌器不辭親酌過門無奈客惡未嘗解下金龜必能畫
得黃鶴

從來歡伯氣和何故督郵味惡陶令無錢但賒潘子著
水不錯

寶子溫江山圖

醉裏扁舟烟浪望中幾展雲山長天秋水一色明月清風兩閒

猫犬圖

狡兔空有三穴首鼠漫持兩端我輩天生健武從渠股慄心寒

北窓高卧圖

問字不得兀兀借書不得陶陶誰遣人來送酒枕邊正讀離騷

雪谷早行圖

積素茫茫縞夜流光耿耿揚輝行人抵死貪路何處家
山未歸

史正之喪子買得

陸郎初見懷橘阿買頗解識字或恐西河喪明忙為東
野收淚

靈照女

留下一重公案有女誰似龐家不試提籃手段若為點

破丹霞

錦堂四景圖

春水滿四澤

蓀蓀舒如羅帶鱗鱗皴似縠紋誰道卧龍不起須臾變
化風雲

夏雲多奇峰

幸得從龍變態尚何出岫無心正苦人間畏日不思天
上為霖

秋月揚明輝

清光一片如洗西去姮娥耐秋可惜廣寒人老誰將玉
斧再修

冬嶺秀孤松

山前傾蓋獨倚雪裏盤根歲深千年老鶴相伴誰似蒼
髯有心

莊靖集卷三

欽定四庫全書

莊靖集卷四

金 李俊民 撰

七言絕句

謁秦吳二王廟

三月十八日與馬子溫郭謙甫楊茂之叔姪

劉濟之君祥仲寬姚子昂邢文炳同行

頽垣陟殿夕陽中
血食雖同事不同
揖讓干戈兩陳迹
酌觴拋與落花風

杖藜行處記曾過草草杯盤野興多舉目山川縱如舊
一場夢抵幾南柯

卜居

東鄰西舍兩三家簌簌牆頭落棗花慙愧畫梁雙燕子
笑人今日又天涯

中秋夜夢

中秋前一夕夢入僧寺往來人物有送別意
須臾有一麗人於橐中出一春衫再四整疊

欲相贈問而雨作趨避漏室中其人行歌而
至雨止聽之歌未終而覺故為紀之

征衣不用贈春羅試聽尊前一曲歌為問從來雲雨事
如何偏向夢中多

讀項羽傳

鴻溝時暫割山河楚國山河一半多欲去故鄉誇富貴
不知沛有大風歌

糟筍

甕中有地可藏真子子孫孫麴蘖醺誰是聖之清者後
此君應負此君君

伯夷孤竹
君之子

新樣團茶

春風傾倒在靈芽纔到江南百草花未試人間小團月
異香先入王川家

重午偶題

只為離騷話獨清至今猶恨楚君臣魂招不得歸何處
閒氣都留與艾人

子猷訪戴圖

雪後山陰本乘興似非特為故人來縱能一見戴安道
船未回時心已回

和籌堂途中即事

晚風吹雨過山堂燈火秋涼好對牀却被荒雞笑人懶
一聲催起著鞭忙

悠悠旌旆出山城世事驚心幾變更水郭烟村誰是伴
老夫矍鑠尚堪行

斗酒中間詩百篇錦囊新句落誰邊無窮山水吟難盡

說似畫師僧巨然

指楊舅彥明

船子和尚圖

千尺絲綸在手中秋月明歸去滿船空寒江豈是魚難釣
釣得還將不釣同

和河樓閒望

孟州

去去來來不繫舟至今師渡幾時休洗兵豈是天無雨
盡逐黃河入海流

一夜長空落將星不知誰抱越人冰中原可惜衣冠地
自古以來多廢興

用籌堂韻

清尊莫惜再三開別後何曾得好懷為向綠衣花使道
杖藜不是等閒來

答滿法師

此身分付水雲間不見高人得句難待學江西立公案
便宜築箇小詩壇

和泰禪

淡泊生涯分自廿十年霜葉碎青衫忽從問道山前過
牧馬之兒是指南

橙數珠

水月禪師有橙數珠竹如意恨不見作者之
句鑿空道其髣髴

典刑釀出洞庭霜只取青圓不待黃凡俗盡從千佛轉
忘言老宿但拈香

從頭細轉梵王經一串
秋香得洞庭為報重甦當自惜
莫教落入念珠廳

重甦即水月也

竹如意

曾為彈琴指甲傷
有時曝背竹書光
不須爬癢倩仙爪
忍待一朝春筍長

即時叅得拍頭禪
說似家風王版傳
一日佛堂光自放
我師歇在古靈前

雪菴二梅圖

老對風光百不堪
畫圖彷彿見江南
為君試草花間賦
未必心腸似雪菴

贈碧落和講主

蕭蕭古寺掩松關
雨後無人草木閒
掃地家風誰舉似
我師特特為開山

跋寶子溫江山圖

淼淼澄江欲拍天
參差烟樹老江邊
舉頭不見長安日
一棹秋風載酒船

過雲臺

夜半風吹霽色開
曉乘殘月過雲臺
連山斷處瞰平野
一線黃流掌上來

濟源龍潭

塵世悠悠不識真
一潭春碧養潛鱗
可憐無故驚雷起
誤却山前失筍人

裴公亭

青山如畫水如藍
自笑平生性僻耽
尊前留連妨逸興

不能一到侍中菴

與奉仙觀道士元明道

野鶴飄飄性自高徘徊塵世豈難拋
棲真舊隱無多地何處仙山不可巢

富公草堂

青山萬疊水縈回山水中間幾往來
風物不殊人世段中州何處是崑臺

謝楊成之

與客西從濟上回明朝扶杖到雲臺一尊相送休頻勸
留作山行軟脚杯

雨後

春空靄靄暮雲低飛過山前雨一犁明日却尋歸去路
馬蹄猶踏落花泥

阻風

東風作惡幾時休況值春光欲盡頭誰謂閒人無箇事
一年長是為花愁

答籌堂見招

須信人生足別離
相看能得幾多時
浮雲一片無根蒂
去去來來自不知

日日相陪鶴髮翁
烏紗白葛道家風
火雲堆向山南去
暑氣蒸人似甑中

俯仰隨人亦自欺
精神無復似當時
年來世事俱嘗遍
只有閒中味不知

冠世聲名蓋世功
尋常杯酒坐生風
區區問舍求田客

盡在元龍一笑中

日日言歸未得歸
白頭纔是入山時
依前却赴逍遙出
慙愧山靈我不知

誰謂長河不可通
只消送客一帆風
故人別後情偏重
猶恐相逢是夢中

史遂良壽日

任他白髮不相饒
兩頰春紅醉裏潮
今夜鳳凰臺上
未知誰可共吹簫

闕

和王李文襄陽變後

將軍橫槊面潮紅一舉淮南掃地空堪笑楚人無伎倆
至今猶說馬牛風

張翔卿出家

絳帕蒙頭讀道書孫郎見後肯容無休將僥倖闕名教
天上臞仙即是儒

鼇背元夜

山市家家秉燭遊風簷齊挂月燈毬不須更用間粧點

人在鰲峰最上頭

許司諫醉吟圖

席地風光引興來
不辭白髮被春催
眼前有句貪拈掇
閒却梨花樹下杯

明皇擊梧圖

不使梨園弟子知
太平音在鳳凰枝
一朝野鹿銜花去
長恨秋風落葉時

秋江斷鴈圖

不堪愁裏見秋光
江北江南木葉黃
誰信朔風猶跋扈
天涯吹斷弟兄行

游石堂山

與史正之王廷秀姚子昂郭顯道李廣之同行

雨後青山盡不如
筭心人去有誰居
紫雲空鎖神清洞

不見丹崖四字書

邢和璞筭心處歐陽文忠公神清之洞

句龍廟

溪行十里氣如蒸
危檻憑虛不厭登
咫尺仙山在塵世
杖藜來往幾人曾

陽關圖

一杯送別古陽關
關外千重萬疊山
試問青青渭城柳
不知眼見幾人還

烟江疊嶂圖

揮毫落紙生雲烟
江北江南水墨天
愛畫主人胸次別
卧遊不用買山錢

千里江山圖

曾把雲山爛熳酬杖藜隨處賈胡留
如今脚力那千里
水墨中間只卧浮

筆下江山取意成一峯未盡一峯生
憑誰試向行人問
水郭烟村第幾程

答祁定之

歸袖迎風拂面埃青山望處白雲埋
如何千載離家鶴
學得仙時不便來

戲贈

布袍襤褸化風埃是處青山骨可埋三笑家風關時了

我師容易去還來

雪中寄

秋空一洗絕纖埃著腳街頭雪半埋試問希真門下客
衣蓑曾有葛三來

不寐

露下中庭鶴睡驚娟娟缺月照窓明夜深讀罷牀頭易

紙帳梅花夢不成

西山問羊

淡泊不禁頻鼎飯尋常無以致羶根
西山繭耳多於石肯與書生踏菜園

暮秋有感

慈鴉無數噪寒林林下風吹落葉深
惟有黃花枝上露向人猶似泣殘金

即事

將軍下馬氣如虹書生折腰曲如弓好山無限歸未得
白雲慙愧渡溪風

即席

秋色南山氣勢高坐間牛酒話麕豪自憐萍梗天涯客
俯仰隨人似桔槔

陸渾佛髻山

十步都無一步平往來人似畫圖行可憐一派溫泉水
不與荒山洗惡名

湯下寺壁

滾滾龍泉自吐吞誰能箇裏混光塵再三遶壁尋題句
饒舌山禽不避人

跋背面彌勒

萬水千山特特來謾勞皮袋走塵埃橫擔拄杖明州去
世上誰能喚得回

題斷碑

節角摧殘卧夕陽豈無神物護文章一從薦福雷轟後

片石猶爭日月光

游青蓮浦值巨川彥廣二上人出

寂寂荒庭落葉堆與誰重上遠公臺青山不解留人住
立盡秋風曦未來

戲曹漢臣

一見高僧話亦高醉中往往愛禪逃爾曹自謂曹溪後
不怕曹溪笑爾曹

移得花將碧落栽一枝開後百枝開今生也有狂時運

待入東林社裏來

碧落院松

霜幹亭亭聳碧空
幾年春雨養髯龍
也能說得菩提法
何處人間有萬松

雪後送寶泉之碧落

酒面輕風不作寒
天花散落滿人間
慙慙行脚休辭遠
出得城門是雪山

陶學士烹茶圖

闕

天寒對酪奴竹間雪鼎與風爐書生事業真堪

闕

莫謂粗人此景無

修武騫林觀

道經天上有王京山騫林觀

闕

帶雨阻登臨往事看碑或可尋不是青牛洞中

闕

人間何處有騫林

射虎

逐鹿中原鹿已無功名那在一於菟分明射中南山虎

李廣元來不丈夫

答籌堂

寄詩有青燈佳話正當時之句見其戀戀之

至也用來韻答

休嫌堂上聚星遲

懷宮有聚星堂

邂逅人生似有時雞黍恐忘

今後約預先報與巨卿知

秋涼急急授衣遲便是霜林葉落時夜聽寒砧動離思

恨無針線小蠻知

叅謀王君玉魏文侯冒雨出獵圖

終朝冒雨入山林畢竟馳驅獲幾禽
自是魏侯言不負當時只合獻虞箴

抱樹石

火餘介子身猶在槁立鮑焦心愈堅
欲向前村問遺叟石荒樹老不知年

和王成之梅韻

踏雪尋芳路帶沙南枝初放兩三花
高樓寄語休吹笛

留取春風與大家

朝來一雪霽晴沙行到前村始見花
驛使便將春色去
暗香今夜落誰家

狂風

春光著物酒如濃
白白紅紅眼界中
又是一場蝴蝶夢
能禁幾度落花風

游錦堂後園

與濟之君祥仲寬子昂共

粧點園林次第新
野花無數不知名
即時喚起閒中興
慙愧陶家趣未成

袁景先東歸喪馬

汗血奔馳死即休
東郊骨骼有誰收
舉鞭遙指前山路
野草閒花滿地愁

長歎短轡慣騎驢
人日徒行為的顛
得失從來等閒事
未知愁得塞翁無

王李花

盤根春後幾枝分似比樹頭花更新落月試將顏色照
便如傳得謫仙神

半丈紅

艷冷香清是就中等閒不肯媚春風東君也恨無顏色
染出枝頭點點紅

溪竹

崎嶇一徑逐溪斜泛泛溪流帶落花為問風前雙燕子
銜泥飛去入誰家

吳神

山頭多少往來人香火爭將瓦鼎焚
簫鼓下山人漸遠晚風吹起一溪雲

過古寨

繫馬垂楊日半斜荒村籬落兩三家
可憐華屋生存處瓦礫堆中幾樹花

大陽與諸友話舊

尋芳來入杏花村見客人人有典刑
不用看碑問前事

坐中一話即圖經

聽樂

時錦堂小疾

聞韶還似在齊時三月猶然味不知若要得他安樂法
請君聽取四休詩

邵氏院看花

誰道花枝不耐寒就中姚魏欲開難賞心未愜空歸去
更待明朝爛熳看

長平懷古

趙括雖能讀父書長平一舉見規模縱橫戰國俱陳迹
只有青山似畫圖

枯松

為嫌紅紫汙家風故向春來學種松祇恐等閒兒女輩
輒將斤斧損髯龍

勸行

衣錦山前往復來莫教酒興盡時回前村見說無深巷
留向谿堂把一杯

留別

耳畔頻頻杜宇聲
馬頭山色翠相迎
一杯不盡留連意
送客風來便好行

送母受益之洛陽

有心待種洛陽田
早趁西風送客船
借問梅花堂上月
不知別後幾回圓

寄大師孫仲遠講道經

鶴骨仙人別後臞
無由得近嘯臺居
我師不了孫家事

絳帕蒙頭說道書

下太行

山中日日伴雲間
不見閒雲只見山
君去試從山下望
青山却在白雲間

德老瑞竹

主人本望鳳來棲
遂把孤根特地移
不念平安猶未報
誰教節外強生枝

籜龍日日斧斤間
可惜孤根托處難
待得上番成竹後

金瓶梅詞話卷四
一枝還作兩枝看

山前偶得

白頭來往話難親
琴酒重尋別後雲
縱使山英不相棄
奈無面目見移文

為徒單雲甫作

萬里相將鶴髮親
倉惶永拂綵衣塵
眼中滴盡孤寒淚
誰是同門請衆人

男兒糊口在四方
聚蚊成雷不可當
孝哉潁叔豈無恥

恐君之羹猶未嘗

過碧落寺

流水溪邊一徑通
參差殿閣倚晴空
東林少箇開山祖
何處人間有遠公

古寺荒涼不記年
庭松相對欲參天
入門不見溪堂主
祇恐蒼髯是老禪

趙

欲憑從約抗強秦
完壁那能係重輕
兩虎共圖全國計

豈無一術救長平

紛紛列國事縱橫誰似邯鄲得地形會罷澠池方氣勝
不思嫁禍有馮亭

觀射柳

羽箭星飛霹靂聲追風馬上一枝橫平生百中將軍手
不意今朝見柳營

戒酒

誰肯收心醉六經只言酒是在天星若能讀得離騷後

學取先生半日醒

游青蓮分韻得春字

已亥暮春十有八日劉巨川濟之瀛漢臣王
特升用亨郭甫仲山姚昇子昂史顯忠遂良
同游福嚴禪院與巨川彥廣二山主道舊兵
革之餘不勝感嘆仍以春山多勝事為韻賦
詩以紀其來

四面山圍故青茶烟榻畔坐忘身與師貪論安心法

門外飛花送却春

慈氏閣

金碧相輝跨杳冥憑高佇目記吾曾勸君試倚欄干望
愧我今無脚力登

出山

興盡東山命駕忙斷雲似與雨商量出門卷地顛風起
送客何須爾許狂

東林景物畫中詩老恨因循著脚遲背了青山却歸去

頭灰面上任風吹

水簾

倒傾蛟室瀉瓊瑰
派落空巖雪浪堆
卷地封姨收不起
素娥垂下玉鈎來

柳

一年春色到溪頭
展盡眉間幾點愁
纔得東君暫時意
笑他張緒不風流

千絲萬縷弄風柔
為愛春陰盡日留
杖屨重來有佳處

道人鑿石沼清流

臨清臺

與諸友憩於臺上須臾四面雲合垂垂欲雨
忽驚平地一聲雷爍爍驕陽氣欲回安得靄靄片時雨
臨清臺是望雲臺

登山興盡早宜歸況是東風送客時只有臨清臺下水
怪人來此不留詩

懷舊

杖藜重到古招提
硤石雲深一徑迷
不見同來舊時伴
怕看雙翠壁間題

新安

芳華原頭一望空
村南村北落花風
可憐當日堆錢屋
寂寂無人晚照中

過二聖王氏故居感戰死者

數仞牆圍石作基
幾年風雨長苔衣
英雄地迫難為計
血汗遊魂不得歸

東山道中

採遍山城草木芽百年老樹盡枯查眼前多少閒田地
雨後春耕有幾家

擲筆臺

空山老却涅槃師擲筆臺前旦過稀
雉子豈知身後事至今猶傍法堂飛

太平泉

試從澗底覓根源剔蘚剝苔得舊泉
人事盡隨流水去

幾時復見太平年

水邊堪賦濯纓歌
來往遊人分外多
為問太平何處是
等閒不識起風波

子榮過家上冢

班超萬里歸無期
張翰雖歸如不歸
君看畫錦堂中相
十五年前一布衣

名遂功成不肯閒
故鄉曾見幾人還
百年扶杖華顛老
爭看錢家錦繡山

十七日送行

忽忽又別故園春花落猶隨馬後塵相對離筵莫惆悵
送行人是欲行人

勉和籌堂來韻

往古來今秋復春羸顛劉蹶總成塵蝸牛角上爭閒氣
笑倒南華夢蝶人

氣似陽和處處春但隨流俗混光塵須知舌在為身累
非是是非何等人

四海男兒得志時歸來一段話新奇野人不管興亡事
飲恨閒看老杜詩

漢祖龍興自有時未應六出計皆奇採芝人向山中老
不見功名一首詩

送穎陽史正之之鄧州

風俗相鄰鵠舌蠻杖藜南去早宜還年今已近強而仕
捷徑休離少室山

贈陳仲和

吾友仲和故遼降虎太師之後以廕補官累
階三品喪亂之際相會於山陽年六十有二
神閒而意適手持數珠日誦佛書不輟真髮
僧也因誦飽諳世事慵開口會盡人情只點
頭之句以此意索詩因書以示之

百年浮世落花風
漆水榮華一夢空
拈起數珠都忘却
大千沙界入圓融

和秦彥容韻

花信風傳閬苑香騰空鶴駕望仙郎當年誰為看爐鼎
曾得丹砂入藥囊

碧落途中遇雪

出郭山行十里餘據鞍擁鼻一臞儒飛花落在吟肩上
便是藍關遇雪圖

大陽值雪

掃地陰雲撥不開北風吹落豆楷灰相逢父老應相笑
直待山頭白後來

呈濟之

朝醒暮醉幾時休
雞黍人家見客留
聞道麴生行處有
西村明日趁扶頭

留別

故人不寄一枝梅
親到前村雪裏來
興未盡時還又去
為君更覓暖寒杯

留別草堂諸友

青山莫厭往來頻
野鶴孤雲自在身
客路傍春風色好

明朝便是遠行人

莊靖集卷四

欽定四庫全書

莊靖集卷五

金 李俊民 撰

七言絕句

和籌堂送別韻

山城望斷首重回，猶勸春風馬上杯。
有似衛軒當日鶴，羽毛養就却歸來。

白髮相逢得幾回，離亭苦勸送行杯。
元龍不識求田意，徒使青山笑往來。

和河上送行韻

沁南幕客盡詩豪
斧月斤雲得句高
吏部文章笑東野

若為自比倚松蒿

有芝蘭元肯伴蓬蒿之句

寄別

馬蹄踏破亂山青
送客風回酒半醒
歸路莫將雲外指

大都一十五長亭

蟻戰圖

聲勢何勞鬪似牛
看看一雨到山頭
大家不肯勤王去

只待槐宮壞即休

膠膠擾擾戰爭多歲月循環得幾何樹下老人觀物化
夢魂應不到南柯

畫鶴

兩翅如輪骨已仙昂昂只合在林泉且休相逐乘軒去
自有人謀二頃田

二頃田應為鶴謀

海棠露

輕風嫋嫋泛崇光長恨司花不與香春睡一聲鶯喚起

却教老眼見啼粧

張氏肯堂

張文定公後

百年蘭玉水邊村
萬軸牙籤席上珍
同隊魚中見頭角
一朝富貴異於人

孟浩然圖

却因明主放還山
破帽騎驢骨相寒
詩句眼前吟不盡
北風吹雪滿長安

蹇驢却指舊山歸
可笑先生五字詩
仕為不求明主棄

此行安得怨王維

上陶固嶺

忽忽出郭曉風寒一片雲收爽氣山上盡坡陀試回首
人家住在翠微間

野菊

風露叢中取次芳愁邊過却幾重陽秋光到處多無主
不是閑花不肯香

席次

不到西山二十春風光別後一番新再三點檢尊前客
白髮相看有幾人

驢為人盜去

磨嫌居士謀生拙碑恨詩人下道看好在隔花臨水處
為誰信轡逐金鞍

長街愁殺鄭昌圖便是徒行魯大夫縱復東家借還許
不知泥滑敢騎無

杜詩東家蹇驢許我借泥滑不敢騎朝天

淵明歸來圖

一旦倉惶馬後牛衣冠從此折腰羞先生不是歸來早
束帶人前幾督郵

席上戲李巽之

薰風原上麥連雲簫鼓家家樂社神半醉尊前喧語笑
老夫愁獨淚沾巾

和史邦直橋上韻

規模杜預見成功橫截長流跨彩虹亭長莫邀來往客
須防中有奪牛公

韓伯林奪牛公

過龍門

流水潺潺漱石根又還懷古過龍門行人但禮龕中像
誰識當年禹作痕

夜夢月下與數仙子酌酒仍各賦詩

天風一掃暮雲開收拾羣仙共酒杯但指今宵是新月
不知曾照古人來

七夕

雲漢雙星聚散頻一年一度事還新民間送巧渾閑事

不見長生殿裡人

姪謙甫任長安回

歸去連昌憶舊游
長安回望使人愁
只誇楊氏錦繡谷
曾上李家花萼樓

枝連葉附本同氣
骨肉疎今幾家
但留濟叔易一卷
與送蔣兄麻兩車

母師聖醉歸夜溺伊河抱橋柱而死

日日貪杯醉不醒
待將風味學劉伶
可憐王子龕前水

夜半寒光落酒星

和張文玘

來詩有匠手今逢老作家之句因用韻和

景物秋來件件佳江山都助與詩家我憐五鬼俱難送
先為文窮結柳車

白髮詩人喜誕誇詞源傾倒少陵家問君讀後書多少
得滿當年惠子車

書生幃下布衣多盡是嘲風詠月家若使烏臺不彈後

看看欲載十牛車

山谷文章六經來汗漫十牛車

數間茆舍老生涯
籬落相依四五家
不見近來門外轍
故人應駕角輪車

和籌堂送迎偶得

懷抱秋來強自寬
相逢賴有舊青山
郊原雨後堪圖畫
勾引詩人興不閑

出門天地望中寬
馬首濃迎著色山
詩句滿前無可道
恨今不復見閑閑

畫手從來說范寬何如著眼看真山天公不欲山無主
分付籌堂好處閑

詩愁誰道酒能寬得句多於飯潁山莫使移文誚長往
工夫那取片時閑

和平太行路韻

六丁驅役鬼神奔一夜開山掌樣平多少往來車馬客
尚憂行路溢難行

鑿開險阻若天成暫使時間眼界平却羨長安西去路

青山不管送人行

千年古道跨山城可笑人心自不平容易莫將天險壞
須防閑客此閑行

自古太行天下險縱令禹鑿不能平尋常著脚無安處
何況羊腸路上行

和君瑞月下聞砧

夜涼枕上夢頻驚有底秋天不肯明老眼近來閑淚少
那禁月下擣衣聲

和籌堂述懷

長恨周人詠黍離不期親到閔周時一朝小雅廢將盡
何處如今更有詩

白頭相見話存亡可惜漫漫夜轉長煩惱盡無安腳處
出門十步九羊腸

訪德老

月下與君瑞邦直從籌堂攜酒訪德老既而
有詩見示因用韻和

夜投破戒遠公家醉墨成章點不加堪笑穎師無手段
聽琴人似聽琵琶

一朝不飲奈愁何月下敲門載酒過佳句曉風楊柳岸
醉時吟了醒時哦

老杜醉歸圖

花下騎驢不踏泥花間醉後復何之慙慙驥子扶歸去
明日重來別有詩

按王內翰注宗武生日宗武小名驥子曾有詩驥子

好男兒又曰驥子最憐渠

保漢公廟

倉惶劉氏未能安跋扈將軍力拔山若使楚人如邵子
肯教義士不生還

按左傳丑父令齊侯如華泉取飲齊頃公與晉戰為
晉所敗退而奔走丑父為御晉帥追之將及丑父請
君潛服而去自著君之飾坐於車上而待晉師晉師
獲丑父知非頃公而欲殺之丑父嘆曰自今以後若

有身代君者皆當如我今受戮晉大夫卻獻子義之
歎曰臣不難死而免其君殺之不祥也宜赦其罪以
成其節母父遂免死而還齊臣逢母父也

戲呈節使王子告

喚取佳人舞繡筵醉中往往愛逃禪我無紅袖堪娛夜
翠被薰香獨自眠

戲北臺孫講師仲遠

何處閑田不可耕山頭烽火水邊營道人高卧雲千頃

留取南臺與鶴鳴

香梅

鄧妓之小字匠手有詩邊仲寧索和因用其
韻

便敢承當人格梅為經詩老品題來如何偏得東君意
占了百花頭上開

近將風度學官梅底事何郎興未來休道司花無妬忌
又從昨夜一枝開

被誰說破夢中梅應有羅浮倒挂來祇為怕愁貪睡後
返魂纔向北枝開

歌拍從誇大小梅典刑難入箇中來洗粧不使風塵浣
冷眼詩人莫倦開

為憐種性透塵香收拾閑愁共一觴向道坐間能賦客
莫教容易見心腸

不知誰使姓名香珍重詩人幾詠觴也學西湖林處士
為花著莫惱枯腸

一枝瀟洒隴頭香分付新愁竹葉觴紙帳不須尋短夢
天涯倦客已無腸

自是尋常不肯香與花同壽百年觴黃昏樓上誰家笛
吹斷愁人寸寸腸

悼蜀

劍閣誰知累卵危厭厭賓主醉無時蜀人不識忠臣淚
剛道嘉王是酒悲

元夜與秦禪洛陽觀燈

行歌聲裏落梅風
爍爍華燈萬盞紅
何似吾師方寸地
一輪明月小參中

歷陽侯

范亞父

韓生去世冠軍廢
獨望楚強心亦勞
謾向鴻門撞玉斗
豈知鹿死在金刀

酈食其

多少中原逐鹿人
獨憑片舌下齊城
淮陰不喜書生事
能免他年獵犬烹

四皓奕棋圖

坐看咸陽王氣收，豈無人傑自安劉。
都緣鴻鵠心猶在，一局閑棋不到頭。

鴻鵠高飛一舉千里，羽翼已就，橫絕四海。

魏徵

立朝謹議盡良規，誰使君王死後疑。
一旦鑾輿渡遼水，即時扶起墓前碑。

王季文南邁怏怏不得意書此以緩之

大家都待倚欄干，摘索幽花草棘間。
方便春風無不到，

忍教雪裏一枝寒

代別呼延路鈴

森森戈戟亂如麻
剛把毛錐傍史家
彈鋏去年門下客
白頭今日又天涯

襄陽守史嵩

梅花堂小酌與河南府馬師共

往來不絕鄭崇門
清濁那分北海尊
今夜梅花堂上月
與人作箇好黃昏

過濟源

幾年不到竹梅間
天際歸來兩鬢斑
一片白雲風掃盡
雙明喜見舊青山

壬寅九日和君玉來韻

山城與客醉陶然
日日相陪費萬錢
馬上行人幾時去
一杯我欲助離筵

書生紙裏亦枵然
欲去街頭恰百錢
寄語西風莫相笑
一杯便是菊花筵

和段正卿韻

出入格

悠然相對酒杯閒忽有新詩落坐間
喚起東籬無限興
黃花須待與君看

百計尋閑不得閑功夫那取片時間
誰知九日龍山客
却被秋光冷眼看

秋日有感

節氣先凋一葉桐人間何處不秋風
梁園勝事隨流水
滿目愁雲鎖故宮

賈佐之以進士充軍被撻

便從甯越立威名可信王尼長作兵著甚不談軍旅事
碧油幢下盡書生

孤村

舍南舍北地多荒三兩

闕

士盡歸箕歛手

未應醫得眼前瘡

解嘲

尊前共醉潑醅香下馬誰家白面郎見說千金能買笑
老夫那得一錢囊

王德華默軒

春秋豈敢措一字賓主不須談兩都萬事盡皆皮裏著
為君終日鼓隴胡

對棋

到頭不可託安危那用搜尋局上機縱出吳宮陣圖外
陰山未免嫁明妃

送苗世顯歸上黨

故人千里寄書來長恨天涯喚不回行路難行澁如棘

歸裝莫待北風催

時河北防秋

跋魯直帖

雞毛不擇三錢筆
黃尾揮成一幅書
莫使觀江神會得
因風奪去錦囊虛

許道真醉吟圖

斷蓬踪跡寄天涯
老去情鍾戀物華
回首錦江春寂寞

一杯愁裏賦梨花

道真號錦江漁隱

探官

版圖填寫百官志楮券類排十字文堪笑吾儒多伎倆
一時鶯爵偕吾君

跋馮應之許司諫跋羊帖

還思寫論付官奴想見臨池興有餘莫把家雞等閑厭
恐教人笑換羊書

王庭秀悠然軒

小軒開後快雙明峭拔南山立翠屏好是晚來新雨過
白雲堆裏露尖青

同申元帥遊司馬山

千年古廟映崇岡寂寂空庭草樹荒
見說早時求得雨一池由有老龍藏

留別

主人把酒再三留送客風高勢未休
更聽愁眉歌一曲尊前腸斷小溫柔

寒食戲書

驀見花間弄藥回同心髻綰綠雲堆
多情更有牆東月

送得秋千影過來

戲楊成之

客路風霜頗倦游出門又是一番愁行人立馬無情甚
扶上征鞍不自由

李晉王墳

雄名凜凜振沙陀為國功深柰老何多少三垂岡上恨
伶人都進百年歌

游沁園

多少庭臺墮劫灰勝游踪跡幾殘碑風流人物今誰在
水綠山青似舊時

申元帥四隱圖

嚴子陵

羊裘隱迹喚難回曾犯當年帝座來京洛江湖樂天性
釣魚臺不羨雲臺

陶淵明

迎門兒女笑牽衣回首人間萬事非自是田園有真樂

督郵那解遣君歸

孟浩然

平生只有住山緣
北闕歸來也自賢
破帽蹇驢風雪裏
新詩句句總堪傳

李太白

謫在人間凡幾年
詩中豪傑酒中仙
不因采石江頭月
那得騎鯨去上天

大顛圖

二

星斗文章世所傳，狂瀾回在禹功前。
先生不踏潮陽路，震旦花開幾大顛。

一夕投荒萬里行，增光日月更誰能。
相逢盡說空門話，多少人間有髮僧。

三害圖 二

慷慨平西氣不衰，勇於三害欲除時。
流芳已入忠臣傳，何處人間更有詩。

挾矢操弓短後衣，揚揚意氣似男兒。
欲憑一怒除民害，

可惜為人自不知

平水八詠

陶唐春色

府西南三里有陶唐廟每至春月傾城出游

祭享

松柏森森護帝宮至今和氣在河東詩人不盡當時事

八景圖中見國風

廣勝晴嵐

府北七十里。有寺曰廣勝。霍山之陽。寺下有海曰大郎。

等閑過了萬千峰。偃蹇相看意不濃。洗出青山真面目。祇疑海底有天龍。

平湖飛絮

府西五里有泊曰平湖。姑山之東。汾水之西。四面皆楊柳如幄。三月上巳。居民祓禊於此。三月湖邊祓禊亭。依依楊柳雨中青。晚來風起花如雪。

春色都歸水上萍

錦灘落花

府西門外有汾水退灘南北二十餘里皆樹
桃焉

春風桃葉復桃根相妬封姨似少恩無限亂紅隨水去
人間何處覓仙源

汾水孤帆

府西二里有渡口

古渡無人鳥跡多眼前歷歷舊山河
片帆不是秋風客誰向中流發棹歌

姑山晚照

府西五十里有姑射山神人居焉

物外神仙自一家等閑不許占烟霞
只今冰雪人何處惆悵山前日易斜

晉橋梅月

府西南二十五里有縣曰襄陵北門外有橋

如虹左右皆梅園

嫩寒籬落似江村雪裏精神月下魂
橋北橋南路分處行人立馬待黃昏

西藍夜雨

府北五十五里洪洞縣之西有寺曰西藍近
汾水一二里遶寺多花竹有水杯池

暮雲深鎖梵王家樓閣崢嶸閱歲華
香火半殘僧入定卧聽窓外落簷花

錦堂四詠

春水滿四澤

一番雨過綠生肥
正是桃花欲浪時
掠地風來吹不皺
細看面面盡玻璃

夏雲多奇峰

初見雲從山裏出
須臾雲結勢如山
一聲霹靂催時雨
雲不能閑山自閑

秋月揚明輝

誰為天公洗眸子試將把酒問姮娥清光一片已如許
斫却桂時應更多

冬嶺秀孤松

凜凜蒼髯晚節孤雪中傾蓋若旁無一經元亮盤桓後
氣壓秦時五大夫

沁園十二詠

熙熙堂

眼前草木強爭春往日繁華一聚塵山水中間賞心在

不知誰是肯堂人

翠蘭亭

蓬艾叢深特地藏
游蜂何處覓幽芳
楚人大段無分別
不識離騷傳裏香

暗香亭

三兩橫斜鶴膝枝
一朝須有返魂時
試看今後黃昏月
得似西湖七字詩

七賢臺

放跡山陽志尚同至今林下仰高風欲將人物圖中看
恐遇生前李衛公

李衛公楚七賢圖

漱玉池

古人觀水必觀瀾一滴涓流一滴寒放取黃陂千萬頃
莫教龍口吐吞難

江源亭

有流杯

羽觴到處不容停爭看中流落酒星彼此一時修禊事
未應人物愧蘭亭

屏俗庵

子猷別墅

世上無人可立談
眼前只有此君堪
當年借得誰家宅
疑是今來屏俗庵

清暉亭

高山森似劒鋌立
流水平如羅帶舒
人在水光山色裏
笑渠潘閬倒騎驢

富覽亭

天於萬物豈私我
領略風光天不嗔
自古山陽景佳處

盡都分付與閑人

桃園

一時得意笑春風
不見春風滿樹空
老去惜花心尚在
為君留眼看蒸紅

意在亭

綠水古今流不盡
好山前後勢相連
適來荷蕢者誰子
應笑有心哉此賢

涌珠泉

淵底睡龍徒有領沙中老蚌恐無胎疾雷驚裂蒼苔地
迸出鮫人淚顆來

碧落四景

橫峰卧雲

蟄龍起後願相從便有人間潤物功一片青山是歸處
無心更逐渡溪風

白雲無心逐風渡溪耳

陰壑積雪

漠漠山陰雪擁門何時天道變寒暄雖然不是回光地

銷得陽和幾許恩

寒泉漱玉

瀝瀝山泉枕畔鳴六根先得一根清從來只向琴中聽
不識徽絃意外聲

枯松挂月

門前老樹數難推獨有栽松道者知夜半風催山月上
政當鶴睡覺來時

周昉內人圖

吹笙

舊曲聞來似斂眉料應祇恨賞音遲梨園傳得新翻譜
著意參差竹裏吹

汲泉

非關古井不波瀾祇恨銀瓶一掬慳欲助長流御溝水
再教紅葉到人間

倦繡

心情猶在未收時却顧花間影漸移不道春來添幾線

日長只與睡相宜

擣衣

一夕秋風鴈過聲
鐵衣辛苦向邊城
將軍不用和戎計
雙杵休辭月下鳴

剪爪

袖裏纖纖只合存
如何春筍不嫌髡
金釵墜後無因見
藏得開元一捻痕

彈琴

休言三尺是枯桐大抵聲音與政通曾得王君意中事
便從絃上和薰風

學書


數幅雲牋自卷舒試教落筆看何如休將彤管題閑句
正要班姬續漢書

按樂

倚風無力見溫柔初下喧天羯鼓樓猶向花陰理新曲
君王不惜錦纏頭

覽鏡

不教朱粉汙天真
長對菱花顧影頻
但把蛾眉掃來淡
尚嫌不似號夫人



莊靖集卷五